

BOSNA I HERCEGOVINA

Brčko distrikt BiH

SKUPŠTINA

BRČKO DISTRIKTA BiH



БОСНА И ХЕРЦЕГОВИНА

Брчко дистрикт БиХ

СКУПШТИНА

БРЧКО ДИСТРИКТА БиХ

*Младена Маглова 2, 76100 Брчко дистрикт БиХ, телефон и факс:
049/215-516*

Младена Маглова 2, 76100 Брчко дистрикт БиХ, тел. и факс: 049/215-516

Na osnovu člana 22 Statuta Brčko distrikta Bosne i Hercegovine – prečišćeni tekst (Službeni glasnik Brčko distrikta Bosne i Hercegovine, broj 2/10), Skupština Brčko distrikta Bosne i Hercegovine, na I. nastavku 31. redovne sjednice održanom 20. juna 2018. godine, u s v a j a

ZAKON
O PLATAMA I DRUGIM NAKNADAMA PRAVOBRANIOCA I
ZAMJENIKA PRAVOBRANIOCA U PRAVOBRANILAŠTVU
BRČKO DISTRIKTA BOSNE I HERCEGOVINE

I. OPĆE ODREDBE

Član 1
(Okvir Zakona)

Ovim zakonom regulišu se plate, naknade i određena materijalna prava pravobranioca i zamjenika pravobranioca u Pravobranilaštvu Brčko distrikta BiH.

II. PLATE, DRUGA PRAVA I NAKNADE

Član 2
(Osnovne mjesečne plate pravobranioca i zamjenika pravobranioca)

- (1) Osnovna mjesečna plata pravobranioca iznosi 3.150,00 KM.
- (2) Osnovna mjesečna plata zamjenika pravobranioca iznosi 2.950,00 KM.

Član 3
(Dodatak na radni staž)

Osnovna mjesečna plata pravobranioca i svakog zamjenika pravobranioca iz člana 2 ovog zakona, povećava se za 0,5% za svaku punu godinu radnog staža, najviše do 40 godina.

Član 4
(Regulisanje osnovne mjesečne plate)

- (1) Plate propisane članom 2 ovog zakona će se korigovati na način što će se procent povećanja izračunati tako što će se usporediti prosječna mjesečna neto plata u Bosni i Hercegovini za prethodnu kalendarsku godinu, u odnosu na prosječnu mjesečnu platu u Bosni i Hercegovini u godini kada je iznosila najmanje 838,00 KM.
- (2) U slučaju da se u nekoj godini prosječna mjesečna neto plata u Bosni i Hercegovini izračunata za kalendarsku godinu smanji, osnovne mjesečne plate

pravobranioca i svakog zamjenika pravobranioca ostaju iste i neće se ponovo povećavati sve dok prosječna mjesečna neto plata u Bosni i Hercegovini izračunata za kalendarsku godinu ne dostigne najviši nivo od 838,00 KM. Nakon toga, plate pravobranioca i svakog zamjenika pravobranioca se povećavaju u skladu sa stavom 1 ovog člana.

(3) Prosječna mjesečna neto plata za kalendarsku godinu bit će ona plata koju objavi Agencija za statistiku Bosne i Hercegovine.

Član 5 (Radno vrijeme)

(1) Broj radnih sati za pravobranilaca i svakog zamjenika pravobranilaca je 40 sati sedmično.

(2) Ukoliko pravobranilac i zamjenici pravobranilaca rade pola radnog vremena, u skladu s posebnim zakonom ili propisima, osnovna mjesečna plata iz člana 2 ovog zakona, korigovat će se u skladu s brojem odrađenih dana u odnosu prema broju redovnih radnih dana za taj mjesec.

Član 6 (Plaćeni godišnji odmor i odsustvo za vjerske praznike)

(1) Pravobranilac i svaki zamjenik pravobranilaca imaju pravo na plaćeni godišnji odmor u trajanju od 30 radnih dana.

(2) Pored prava na godišnji odmor definisanog u stavu 1 ovog člana, pravobranilac i svaki zamjenik pravobranilaca imaju pravo na dva plaćena i dva neplaćena dana odsustva godišnje za zadovoljenje vjerskih obaveza.

(3) Plaćeni godišnji odmor za pravobranilaca i svakog zamjenika pravobranilaca bit će regulisan planom godišnjih odmora u skladu s propisima o unutrašnjem poslovanju Pravobranilaštva Brčko distrikta BiH.

Član 7 (Vanredno plaćeno odsustvo)

(1) Pored godišnjeg odmora i odsustva za vjerske praznike regulisanog članom 6 ovog zakona, pravobranilac i svaki zamjenik pravobranilaca imaju pravo na sedam plaćenih dana odmora u kalendarskoj godini kako slijedi:

1. u slučaju ženidbe/udaje: 5 dana;
2. u slučaju smrti bliskog srodnika (supružnika, partnera, majke, oca, očuha, maćehe, djeteta, pastorka/pastorke, brata, sestre, polubrata, polusestre): 3 dana;
3. u slučaju smrti manje bliskog srodnika (djeda, bake ili bliskog srodnika bračnog druga ili partnera): 1 dan;
4. u slučaju rođenja djeteta: 2 dana;
5. u slučaju selidbe iz stalnog prebivališta u drugo prebivalište: 1 dan.

Član 8 (Naknada prilikom odlaska u penziju)

Pravobranilac i zamjenik pravobranilaca imaju pravo na otpremninu prilikom odlaska u penziju u iznosu od jedne osnovne mjesečne plate iz člana 2 ovog zakona.

Član 9
(Zdravstveno osiguranje i bolovanje)

Pravobranilac i zamjenik pravobranioca imaju pravo na zdravstveno osiguranje i bolovanje u skladu s važećim Zakonom o zdravstvenom osiguranju u Brčko distriktu BiH.

Član 10
(Penzijsko i invalidsko osiguranje)

Pravobranilac i zamjenik pravobranioca imaju pravo na penzijsko i invalidsko osiguranje u skladu s važećim Zakonom o penzijskom i invalidskom osiguranju u Federaciji Bosne i Hercegovine, ili u Republici Srpskoj, zavisno od fonda u koji su uplaćivali doprinose.

Član 11
(Naknada u slučaju suspenzije)

(1) Za vrijeme suspenzije pravobraniocu, odnosno zamjeniku pravobranioca pripada naknada plate u iznosu od 80% plate isplaćene u mjesecu koji je prethodio udaljenju s funkcije.

(2) Ukoliko pravobranilac ili zamjenik pravobranioca ne budu proglašeni krivim u krivičnom ili disciplinskom postupku, pripada im razlika do pune plate koju bi inače ostvarili.

Član 12
(Naknade za putne troškove)

Pravobranilac i zamjenik pravobranioca imaju pravo na naknadu za troškove nastale u toku službenog putovanja (dnevnice, prijevoz i smještaj) u skladu s važećim podzakonskim aktom u pravosuđu Brčko distrikta, i odobrenim budžetom Pravobranilaštva Brčko distrikta BiH.

Član 13
(Naknade za troškove edukacije)

Pravobranilac i zamjenik pravobranioca imaju pravo na naknadu za troškove nastale u toku edukacije u skladu s propisima o unutrašnjem poslovanju Pravobranilaštva Brčko distrikta BiH i odobrenim budžetom Pravobranilaštva Brčko distrikta BiH.

III. ZAVRŠNE ODREDBE

Član 14
(Stavljanje odredbi van snage)

Odredbe sadržane u drugim zakonima, propisima ili odlukama Brčko distrikta koje su u suprotnosti s odredbama ovog zakona, prestaju da važe danom stupanja na snagu ovog zakona.

Član 15
(Objavljivanje i stupanje na snagu)

Ovaj zakon stupa na snagu osmog dana od dana objavljivanja u Službenom glasniku Brčko distrikta BiH.

Broj: 01-02-412/18
Brčko, 20. 6. 2018. godine

PREDSJEDNIK
SKUPŠTINE BRČKO DISTRIKTA BiH
Esed Kadrić